





文章 17  
W82  
.5

和靖詩鈔

林逋字君復杭之錢塘人少孤力學刻志不仕結廬西湖孤山真宗聞其名賜粟船詔長吏歲時勞問臨終詩有茂陵他日求遺稿猶喜曾無封禪書時人高其志識賜謚和靖先生逋不娶無子所居多植梅畜鶴泛舟湖中客至則放鶴致之因謂梅妻鶴子云其詩平澹邃美而趣向博遠故辭主靜正而不露刺譏梅聖俞謂詠之令人忘百事大數塞王孟之幽而攄劉韋之逸歐陽文忠愛其詠梅花詩疎影橫斜一聯謂前世未有此句黃涪翁則以雪後園林二語為勝之蓋一取神韻一取意趣皆為傑句然知歐陽之所賞者多知涪翁之所賞者少也所傳雖夥未嘗留稿或問之曰吾不欲取名于時



昭和六年二月一日贈  
土岐善唐氏寄

010185188316



况後世乎故所存百無一二如當時稱其五言有草泥  
行郭索雲木叫鉤駟句集中已不可得其他遺軼可知  
也

送牛秀才之山陽省兄

之子詠陟岡別我歲時晏後夜失羣鶴高天着行鴈楚山  
遠近出江樹青紅間尊酒無足辭離愁滿行盼

和運使陳學士遊靈隱寺寓懷

山豁氣相合旦暮生秋陰松門韻虛籟錚若鳴瑤琴舉目  
羣狀動傾耳百慮沉按部旣優游時此振衣襟泓澄冷泉  
色寫我清曠心飄飄白猿聲答我雅正吟經臺復丹井捫  
羅嘗徧臨鶴蓋青霞映玉趾蒼苔侵溫顏煦槁木真性馴  
幽禽所以仁惠政及物一一淡洒翰璘珣壁返駕旃檀林

回睨窳堵峰天牛千萬尋

上湖閒泛艤舟石函因過下湖小墅

平臯望不極雲樹遠依依及向扁舟泊還尋下瀨歸青山  
連石埭春水入柴扉多謝提壺鳥留人到落暉

西湖舟中值雪

浩蕩彌空濶霏霏接水濱舟移忽自却山近未全分凍軫  
閒清泛溫鑪擁薄薰悠然詠招隱何許款離羣

湖村晚興

滄洲白鳥飛山影落晴暉映竹犬初吠弄船人各歸水波  
隨月動林翠帶煙微寺近疎鐘起蕭然還掩扉

湖山小隱

猿鳥分清絕林蘿擁翠微步穿僧徑出肩搭道衣歸水壑



香醑熟煙嵐早笋肥功名無一點何要更忘機  
園井夾蕭森紅芳墮翠陰晝巖松颯靜春塹竹鷄溪歲課  
非無术家藏獨有琴顏原道事在千古壯閑心  
衡門鄰晚島環堵背寒岡片月通蘿徑幽雲在石牀客遊  
拋鄩杜漁事擬滄浪管樂非吾尚昂頭官自方

小隱自題

竹樹遶吾廬清溪趣有餘鶴閒臨水久蜂懶得花疎酒病  
妨開卷春陰入荷鋤嘗憐古圖書多半寫樵漁

北山寫望

晚來山北景圖畫亦應非村路飄黃葉人家濕翠微樵當  
雲外見僧向水邊歸一曲誰橫笛蒹葭白鳥飛

中峰

中峰一徑分盤折上幽雲夕照前村見秋濤隔嶺聞長松  
含古翠衰藥動微薰自愛蘇門嘯懷賢事不羣

小圃春日

岸幘倚微風柴籬春色中草長團粉蝶林暖墜青蟲載酒  
為誰子移花獨乃翁於陵偕隱事清尚未相同

郊園避暑

柴門鮮人事氛垢頗相忘愛彼林間靜復茲池上涼託心  
時散帙遲客復攜觴况有陶籬趣歸禽語夕陽

園廬秋夕

蘭社衰衰香開扉趣自長寒煙宿墟落清月上林塘意想  
殊為適形骸固可忘援琴有餘興聊復寄吟觴

山村冬暮



衡茅林麓下春色已微茫  
雪竹低寒翠風梅落晚香  
樵期多獨往茶事不全忙  
雙鷺有時起橫飛過野塘

山中冬日

殘雪照籬落空山無俗韻  
鷄寒懶下樹人晏獨開門  
廢圃春榮動回塘霧氣昏  
誰家歲酒熟輟棹憶西村

旅館寫懷

垂成歸不得危坐對滄浪  
病葉驚秋色殘蟬怕夕陽  
可堪疎舊計無復更剛腸  
的的孤峰意淡宵一夢狂

出曹州

詩懷動歎嗟驢立帽陰斜  
雨灤生新慊茅叢夾舊槎  
午煙昏獨店岡路透誰家  
幾日江南興扁舟泊岸沙

盱眙山寺

下傍盱眙縣山崖露寺門  
疎鐘過淮口一徑入雲根  
竹老生虛籟池清見古源  
高僧拂經榻茶話到黃昏

畱題李頡林亭

無琴枕鶴經盡日卧林亭  
啼鳥自相語幽人誰欲聽  
半闌花籜白一徑草盤青  
何必對樽酒此中堪獨醒

翠微亭

在金陵清涼寺

亭在江干寺清涼更翠微  
秋階響松子雨壁上苔衣  
絕境長難得浮生不擬歸  
旅懷何計是西庵又斜暉

高郵臺城寺水亭

金井前朝事林僧問不知  
綠苔欺破閣白鳥占閒池  
清楚曾經晉荒唐直到隋  
南廊一聲磬斜照獨凝思

淮甸南遊

天寶中



幾許搖鞭與淮天晚景中樹林兼雨黑草實着霜紅膽氣  
誰憐俠衣裝自笑戎寒威敢相掉獵獵酒旗風

聞葉初秀才東歸

高鴻多北向極目雨餘天春滿吳山樹人登汴水船吟生  
千里月醉盡一囊錢肯便懷鄉邑時清復少年

病中謝馮彭年見訪

老去已多病况當梅雨時山空門自掩晝永枕頻移晚燕  
巢猶濕新篁籜未披若非求仲至誰復問棲遲

無琴將歸四明夜坐話別任君

酒酣相向坐別淚濕吟衣半夜月欲落千山人憶歸亂塵  
終古在長瀑倚空飛明日重攜手前期易得違

和梅聖俞雪中同虛白上人見訪

湖上玩佳雪相將惟道林早煙村意遠春漲岸痕淡地僻  
過三徑人閑試五禽歸橈有餘興寧復比山陰

和酬杜從事題壁

弭蓋入衡宇相看情獨淡蕭疎秋樹色老大故人心佳話  
頻移晷清標幾拂襟寥然長卿壁題此比兼金

夏日寺居和酬葉次公

午日猛如焚清涼愛寺軒鶴毛橫蘚陣蟻穴入莎根社信  
題茶角樓衣笠酒痕中餐不勞問荀菊淨盤鐫

送長吉上人

囊集暮雲篇行行宜廢禪青山買未暇朱闕去隨緣茗試  
幽人井香焚賈客船淮流遲新月吟玩想忘眠

春日送袁成進士北歸



春潮上海門歸鴈遠行分千里倦行客片帆還送君酒波  
欺碧草歌疊裏晴雲來歲東堂桂聊酬一戰勳

送史殿省典封州

馬援疏蠻邑銅標何可窮人煙時亦有海色自如空髭髮  
梅分白旌旗瘴減紅惟應蒔藥罷埋照酒醪中

送王舍人罷兩浙憲赴闕

上問還旌節明廷覲冕旒清談傾綺席蠹簡壓歸舟越俗  
今無訟閑田亦有秋公朝論爵賞當拜富民侯

送昱師赴請姑蘇

同載闔閭人衣囊覆氎巾新煙赤岸暝融雪太湖春鐘遠  
移齋候香遲上定身當知舉如意寶地雨花頻

送皎師歸越

林間久離索忽忽望西陵靜戶初聞扣歸舟又說登野煙  
含樹色春浪疊沙稜幸謝雲門路同尋苦未能

送越倅楊屯田赴闕

越中分治罷山水別來初詩景多留石船痕半載書野程  
江樹遠公讌郡樓虛看塞嚴徐召清風滿直廬

送思齊上人之宣城

林嶺藹春暉程程入翠微泉聲落坐石花氣上行衣詩正  
情懷澹禪高語論稀蕭閑水西寺駐錫莫忘歸

洞霄宮

大滌山相向華陽路暗通風霜唐碣久草木漢祠空劔石  
苔花碧丹池水氣紅幽人天柱側茅屋灑松風

寄思齊上人



松下中峰路懷師日日行靜鐘浮野水淡寺隔春城閣掩  
茶煙晚廊迴雪溜清當期相就宿詩外話無生

寄吳肅秀才

時吳在天王院夏課

肄業寄僧房暑天湖上涼竹風過枕簟梅雨潤巾箱引步  
青山影供吟白鳥行明年重訪舊身帶桂枝香

寄清曉閣黎

前時春雪晴林壑趣彌清幾憶山陰講兼忘谷口耕樹叢  
歸夕鳥湖影浸寒城還宜重相訪柴門掩杜蘅

寄孫仲簿公

低折滄洲簿無書整兩春馬從同事借妻怕罷官貧道僻  
收閒藥詩高笑古人仍聞長吏奏表乞瑣廳頻

寄和昌符

家近太行居西歸壓一驢同儕多及第高論獨知書名迹  
收藏徧公門請謁疎離愁不可寫蟬噪夕陽初

淮甸城居寄任刺史

擾擾非吾事澁居斷俗情石莎無雨瘦秋竹共蟬清劍在  
慵閑拂詩難憶細評寥然獨稽枕淮月上山城

寄輦下傳神法相大師

禁寺諸供奉如師藝學稀粉輕昏古本羅重拆秋衣淨懺  
生瓶暈連陰長竹圍算應支遁馬毛骨苦無肥

寄臨川司理趙時校書

遠宦風波隔歸期歲月頻天形孤鳥晚煙色大江春驛路  
向江郭船檣留賈人高臺望不極空使鬢華新

贈崔少微



賢才負聖朝終日掩衡茅尚靜師高道甘貧絕俗交  
看壁蠹蒸木拾鄰梢却憶楊夫子勞勞事解嘲

贈胡介

妻兒終擬棄舊識盡名賢高節嫌趨世常流笑學仙  
金方燒易得星度算來玄祗說尋山去相期已數年

宿洞霄宮

秋山不可畫秋思亦無垠碧澗流紅葉青林點白雲  
涼陰一鳥下落日亂蟬分此夜芭蕉雨何人枕上聞

湖山小隱二首

道着權名便絕交一峰青翠濕衡茅莊生已憤鴟鴞嚇  
楊子休譏蝮涎嘲滴滴藥泉來石竇霏霏茶藹出松梢  
琴僧近借南薰譜且併閑工子細抄

閑搭綸巾擁縹囊此心隨分識興亡黑頭爲相雖無謂  
白眼看人亦未妨雲噴石花生劒壁雨敲松子落琴牀  
清猿幽鳥遙相叫數筆湖山又夕陽

湖上晚歸

卧枕船舷歸思清望中渾恐是蓬瀛橋橫水木已秋色  
寺倚雲峰正晚晴翠羽濕飛如見避紅蕖香嫋似相迎  
依稀漸近誅茅地鷄犬林籬隱隱聲

湖上初春偶作

梅花開盡臘亦盡晴暖便如寒食天春色半歸湖岸柳  
人家多上郭門船文禽相並映短草翠嫩欲生浮嫩煙  
幾處酒旗山影下細風時已弄繁絃

西湖春日

西湖春日

八



爭得才如杜牧之試來湖上輒題詩  
春煙寺院敲茶鼓夕照樓臺卓酒旗  
濃吐襟芳薰歎嘔濕飛雙翠破連漪  
人間幸有蓑兼笠且上漁舟作釣師

池上春日

一池春水綠於苔水上花枝竹間開  
芳草得時依舊長禽無事等閒來  
年顏近老空多感風雅含情苦不才  
獨有浴沂遺想在使人終日此徘徊

西巖夏日

蕙帳蕭閑掩弊廬子真巖石坐來初  
爲驚野鳥巢間乳懶過隣僧竹裏居  
新溜迸涼侵靜語晚雲浮潤上殘書  
何煩彊捉白團扇一柄青松自有餘

夏日卽事

石枕涼生菌閣虛已應梅潤入圖書  
不辭齒髮多衰病所喜林泉有隱居  
粉竹亞梢垂薄露翠荷差影聚遊魚  
北窗人在羲皇上時爲淵明一起予

隱居秋日

行藥歸來卽杜門嘯臺秋色背人羣  
幽蟲傷草晚相映遠水着煙寒未分  
高亢可能稱獨行窮空猶擬賴斯文  
過從好事今誰是自笑何如楊子雲

秋日湖西晚歸舟中書事

水痕秋落蟹螯肥閑過黃公酒舍歸  
魚覺船行沉草岸犬聞人語出柴扉  
蒼山半帶寒雲重丹葉疎分夕照微  
却憶清谿謝太傅當時未解惜蓑衣

溪居雜興六首

和青詩少

九



諸葛孔明謝安石畜經濟之才雖結廬南陽攜妓東山  
未嘗不以平一字內躋致生民爲意鄙夫則不然胸腹  
空洞剪然無所存置但能行樵坐釣外寄心於小律詩  
時或鑿兵景物衡門情味則倒覲二君而反有得色兀  
所寓輿輒成短篇總曰茂居雜興詩六首蓋所以狀林  
麓之幽勝據几格之閑曠且非敢求聲於當世故援筆  
以顯其事云

隱居松籟細錚然何獨微之重碧鮮已被遠峰擊雙巒更  
禁初月吐娟娟門庭靜極霖苔露籬援涼生裊菊煙中有  
病夫披白搭瘦行清坐詠遺篇

四壁垣衣釣具腥已甘衡泌號沉冥伶倫近日無侯白奴  
僕當時有衛青花月病懷看酒譜雲蘿幽信寄茶經茅君  
使者蕭閑甚獨理叢毛向戶庭

薄夫何苦事姦姦一室琴書自解顏峰後月明秋嘯去水  
邊林影晚樵還文章敢道長於古光景渾疑剩却閑多少  
煙霞好猿鳥令人惆悵謝東山

冉冉秋雲抱嘯臺一丘松竹是閑媒誰聞濟北傳兵略枉  
說山東出相才樵褐短長披搯膝丹爐高下壘懸胎三千  
功行無圭角可望虛皇九錫來

上書可有三千牘下筆曾無一百函閒卷孤懷背塵世獨  
營幽事傍雲巖僧分乳食來陰洞鶴觸茶薪落蠹杉未似  
周顛少貞勝北山應免略相衙

松竹封侯尚未尊石爲公輔亦云清華自合論閑客玄  
墨何妨事靜君鶴料免慚尸厚祿茶功兼礙策元勳幽人



不作山中相且擁圖書卧白雲

雜興四首

短褐蕭蕭頂幅巾擁書纔罷卽嘯呻耕樵可似居山者飲  
饌長如病酒人閉戶不無慵答客焚香除是靜朝真前賢  
風槩聊希擬一刺偏多并大春

散帙揮毫總不忤病懷愁緒坐相兼苔痕作意生秋壁樹  
影無端上古簾一餐等閑甘汨汨五門平昔避炎炎惟應  
數刻清涼夢時曲顏肱與未厭

湖上山林畫不如霜天時候屬園廬梯斜晚樹收红柿筒  
直寒流得白魚石上琴尊苔野淨籬陰鷄犬竹叢疎一關  
兼是和雲掩敢道門無卿相車

掉臂何妨入隱淪高賢應總貴全真次山有以稱聲叟魯

望兼之傳散人拂水遠天孤榜晚夾村微雨一溪春不知  
圖畫誰名手狀取江湖太古民

孤山後寫望

水墨屏風狀總非作詩除是謝玄暉溪橋裊裊穿黃落樵  
斧丁丁斫翠微返照未沉僧獨往長煙如淡鳥橫飛南峰  
有客鋤園罷閑倚籬門忘却歸

孤山寺端上人房寫望

底處憑闌思眇然孤山塔後閣西偏陰沉畫軸林間寺零  
落碁枰葑上田秋景有時飛獨鳥夕陽無事起寒烟遲留  
更愛吾廬近祇待重來看雪天

孤山寺

雲峰水樹南朝寺祇隔叢篁作並鄰破殿靜披蘿曰古齋



房開試酪奴春白公睡閣幽如畫張祐詩牌妙入神乘興  
醉來拖木突翠苔蒼蘚石磷磷

西湖

混元神巧本無形匠出西湖作畫屏春水淨於僧眼碧晚  
山濃似佛頭青藥爐粉堵搖魚影蘭杜煙叢閣鷺翎往往  
鳴榔與橫笛細風斜雨不堪聽

平居遣興

有甚餘閑得解嘲高慵時把几棎敲卑致晚鳥沉幽語歷  
刺煙篁露病梢草野交遊披褐見神仙書史點朱抄皇朝  
不是甘逃道爭向心如許與巢

池陽山店

數家村店簇山旁下馬危橋已夕陽驚鳥忽衝谿靄破暗  
花閑墮塹風香時間盤泊心猶戀日後尋思興必狂可惜  
迴頭一聲笛酒旗搖曳出疎篁

易從上人山亭

湖上汪灣隔數峰籬門和竹夾西東閑來此地行無厭又  
共吾廬看不同靈隱路歸秋色裏招賢庵在鳥行中屏風  
若欲相攬見合把巉巖與畫工

過蕪城縣

詩中長愛杜池州說着蕪城是勝遊山掩縣城當北起渡  
衝官道向西流風稍檣碇網初下雨擺魚薪市未收更好  
兩三僧院舍松衣石髮鬪山幽

無爲軍

掩映軍城隔水鄉人煙景物共蒼蒼酒家樓閣搖風旆茶



客舟船簇雨檣殘  
笛遠砧聞野墅老  
苔寒檜看僧房狎鷗  
更有江湖與珍重  
江頭白一行

耿濟口舟行

環迴幾合似江干  
刺眼詩幽盡狀難  
沙背半平春晚濕  
水痕無底照秋寬  
老霜蒲葦交千刃  
怕雨鳧鷖著一攢  
擬就孤峰寄篔簹  
笠舊鄉漁業久凋殘

園廬

柴關寒井對蕭晨  
自愛棲遲近古人  
閑草徧庭終勝俗  
好書堆案轉甘貧  
橋邊野水通漁路  
籬外青山見寺鄰  
懶爲躬耕詠梁甫  
吾生已是太平民

春陰

似雨非晴意思淡  
宿醒牽率卧春陰  
苦憐燕子寒相並  
生怕梨花晚不禁  
薄薄簾幃歎欲透  
遙遙歌管壓來沉  
北園南陌狂無數  
只有芳菲會此心

山園小梅二首

衆芳搖落獨暄妍  
占盡風情向小園  
疎影橫斜水清淺  
暗香浮動月黃昏  
霜禽欲下先偷眼  
粉蝶如知合斷魂  
幸有微吟可相狎  
不須檀板共金尊  
剪綃零碎點酥乾  
向背稀稠畫亦難  
日薄縱甘春至晚  
霜深應怯夜來寒  
澄鮮秖共鄰僧惜  
冷落猶嫌俗客看  
憶着江南舊行路  
酒旗斜拂墮吟鞍

又詠小梅

數年閑作園林主  
未有新詩到小梅  
摘索又開三兩朵  
團欒空遠百千迴  
荒隣獨挾山初盡  
晚景相禁雪欲來  
寄語



清香少愁結爲君吟罷一銜杯

梅花

吟懷長恨負芳時爲見梅花輒入詩  
雪後園林纔半樹水邊籬落忽橫枝  
人憐紅艷多應俗天與清香似有私  
堪笑亦風味解將聲調角中吹

小園煙景正淒迷陣陣寒香壓麝臍  
湖水倒窺疎影動屋簷斜入一枝低  
畫名空向閒時看詩客休徵故事題  
慚愧黃鸝與蝴蝶祇知春色在桃溪

杏花

蓓蕾枝梢血點乾粉紅腮頰露春寒  
不禁煙雨輕欹着祇好庭臺愛惜看  
隈柳傍桃斜欲墜等鶯期蝶猛成團  
京師巷陌新晴後賣得風流更一般

贈胡明府

一琴牢落倚松窗孤澹無君得趣長  
謁廟有時封縣版坐衙終日着公裳  
爲收牌印教村僕偶檢圖書見古方  
徵足稅錢人更靜卻搯吟策立秋廊

寄傅霖

葛蔓煙枯束六經高廉渾與昔賢停  
黃牙稚子跨牛種白眼山人識劍形  
寒睡草旁林酒壯曉思河曲雨槎腥  
傳聞曾說平生事不要清朝夢武丁

寄太白李山人

顏如童子髮如鬢卜築溪當太白西  
身上祇衣麤直掇馬前長帶古偏提  
鷗鵬懶擊三千水龍虎閑封六一泥  
幾獨枕肱人迹外半窗松雪論天倪



春日寄錢都使

桃花枝重肉紅垂，萱草抽苗抹綠肥。  
正語暖鶯風細細，著雙寒燕雨稀稀。  
亭臺物景兼飄絮，宅院時情漸夾衣。  
拍背挾肩行樂事，不甘離索向芳菲。

寄題歷陽馬仲文水軒

構得幽居近郭西，水軒風景獨難齊。  
煙含晚樹人家遠，雨濕春蒲燕子低。  
紅燭酒醒多聚會，粉牋詩敵幾招攜。  
旅遊今日堪搔首，搖落山城困馬啼。

春暮寄懷曹南通守任寺丞

中行

跌蕩情懷每事同，十年曹社醉春風。  
彈弓園圃陰森下，碁子廳堂寂靜中。  
赤脚我猶無一婢，黑頭君合作三公。  
江湖今日還勞結目送，歸飛點點鴻。

復賡前韻且以陋居幽勝詫而誘之

畫其藥材懸屋壁，琴兼茶具入船扉。  
秋花挹露明紅粉，水鳥衝煙濕翠衣。  
石磴背穿林寺近，竹煙橫點海山微。  
百千幽勝無人見，說向吾師是洩機。

孤山隱居書壁

山水未深猿鳥少，此生猶擬別移居。  
直過天竺溪流上，獨樹爲橋小結廬。

池上作

簇簇菰蒲映蓼花，水痕天影蘸秋霞。  
分明似箇屏風上，飛起鷓鴣一道斜。

竹林

寺籬斜夾千梢翠，山磴深穿萬籜乾。  
却憶貴家廳館裏，粉



穉時畫數莖看

葑田

淤泥肥黑稻秧青濶蓋溪流旋旋生擬倩湖君書版籍水  
仙今佃老農耕

易從師山亭

林表秋山白鳥飛此中幽致亦還稀西村渡口人煙晚坐  
見漁舟兩兩歸

秋江寫望

蒼茫沙嘴鷺鷥眠片水無痕浸碧天最愛蘆花經雨後一  
篷煙火飯漁船

乘公橋作

晚峰橫碧樹梢紅數榜漁曾水影中憶得江南曾看着巨

然名畫在屏風

巨然僧尤妙山水

初夏

乳雀啁啾日氣濃雉桑交影綠重重秧田百畝鵝黃犬橫  
策溪村屬老農

秋日含山道中廻寄歷陽希然山人

村落人家摠入詩下驢盤薄立多時霜陂一掬清於鑑漱  
着牙根便憶歸

送易從師還金華

吟卷田衣歲向殘孤舟夜泊大江寒前巖數本長松色及  
早歸來帶雪看

自作壽堂因書一絕以誌之

湖上青山對結廬墳前脩竹亦蕭疎茂陵他日求遺稿猶



喜曾無封禪書

春日懷歷陽後園遊兼寄宣城天使

昔年行樂伴王孫事盡清狂是後園一榻竹風橫懶架半  
軒花月倒頑盆佳人暗引鸞言語芳草閑迷蝶夢魂今日  
淒涼舊春色可堪煙雨近黃昏

祖徠詩鈔

士

石介字守道兗州奉符人年二十六舉進士甲科為鄆  
州觀察推官歷官至國子監直講慶曆中進用韓范富  
杜諸臣介躍然喜曰此盛事也雅頌吾職其可已乎乃  
作慶曆聖德詩直指大臣分別邪正詩出泰山孫明復  
曰子禍始于此矣以是為人所擠杜祁公韓魏公俱薦  
之拜太子中允直集賢院尋卒于家怒之者謂其詐死  
北走契丹請斲棺驗之幸不許所為詩文皆根抵至道  
排斥佛老及姦臣宦女廢幾聖人之徒魯人稱為祖徠  
先生因以名其集永叔詩云問胡所專心仁義丘與軻  
楊雄韓愈氏此外豈知他尤勇攻佛老奮筆如揮戈又  
云金可爍而銷玉可碎非堅不若書以紙六經皆紙傳



但當書百本傳百以爲千或落于四夷或藏在深山待  
彼謗焰熄放此光芒懸今讀其詩嶙峋硤砢挺立千尋  
溫厚之意存于激直得見風人之遺然正學忤時直道  
致黜千古一轍其可哀也

慶曆聖德頌

三月二十一日大昕皇帝御紫宸殿朝百官相得象殊  
拜竦樞密使夷簡以司徒歸第二十二日制命昌朝參  
知政事弼樞密副使二十六日勅除脩靖素並充諫官  
四月八日皇帝御紫宸殿朝百官衍樞密使仲淹琦樞  
密副使乃用御史中丞拱宸御史邈御史平諫官脩靖  
十一疏追竦樞密使勅十三日勅又除襄爲諫官天地  
人神昆蟲草木無不懽喜皇帝退姦進賢發於至聰動

於至誠奮於睿斷見於剛克陟黜之明賞罰之公也上  
視漢魏隋唐五代凡千五百年其間非無聖神之主盛  
明之時未有如此選人之精得人之多進人之速用人  
之盡實爲希濶殊尤曠絕盛事在皇帝之德之功爲卓  
犖瑰偉神明魁大古者一雲氣之祥一草木之異一蹄  
角之怪一羽毛之瑞當時羣臣猶且濃墨大字金頭鈿  
軸以稱述頌美時君功德以爲無前之休丕天之績如  
仲淹弼實爲不世出之賢求之於古堯則夔龍舜則稷  
契周則閎散漢則蕭曹唐則房魏陛下有之諸臣亦皆  
今天下之人望爲宰相諫官者陛下盡用之此比雲氣  
草木蹄角羽毛之異萬萬不侔豈可翻無歌詩雅頌以  
播我君之休聲烈光神功聖德刻于琬琰流于金石告



于天地奏于宗廟存于萬千年而無窮盡哉臣實羞之  
臣嘗愛慕唐大儒韓愈爲博士日作元和聖德頌千二  
百言使憲宗功德赫奕燁燁昭于千古至今觀之如在  
當日陛下今日功德無讓憲宗臣文學雖不逮韓愈而  
亦官於太學領博士職歌詩讚頌乃其職業竊擬於愈  
輒作慶曆聖德頌一首四言凡九百六十字文辭鄙俚  
固不足以發揚臣子之心亦欲使陛下功德燁燁昭于  
千古萬千年後觀之如在今日也臣不勝死罪臣賤無  
路以進姑藏諸家以待樂府之採焉

於維慶曆三年三月皇帝龍興徐出闔闔晨坐太極晝開  
閭闔躬攬賢英手鋤姦桀大聲颯颯風風震搖六合如乾之動  
如雷之發昆蟲踣躅妖怪藏滅同明道初天地嘉吉初聞

皇帝蹙然言曰予父予祖付予大業予恐失墜實賴輔弼  
汝得象殊重慎微密君相予久予嘉民伐君仍相予笙鏞  
斯協昌朝儒者學聞該洽與予論政傳以經術汝貳二相  
庶績咸秩惟汝仲淹汝誠予察太后乘勢湯沸大熱汝時  
小臣危言業業爲予司諫正予門闥爲予京兆望予讒說  
賊叛于夏往予式遄六月酷日大冬積雪汝暑汝寒同於  
士卒予聞辛酸汝不告乏予晚得弼予心弼悅弼每見予  
無有私謁以道輔予弼言蒞切予不堯舜弼自咎罰諫官  
一年奏疏滿篋侍從週歲忠力盡竭契丹亡義檣杌饕餮  
敢侮大國其辭慢悖弼將予命不畏而憚卒復舊好民得  
食褐沙磧萬里死生一節視弼之膚霜剝風裂觀弼之心  
鍊金鍛鐵寵名大官以酬勞渴弼辭不受其志莫奪惟仲



淹弼一夔一契天實賚予予其敢忽並來弼予民無瘥札  
曰衍汝來汝予黃髮事予二紀毛禿齒豁心如一兮率履  
弗越遂長樞府兵政無蹶予早識琦琦有奇骨其器魁欄  
豈視居樸其人渾樸不施剗剔可屬大事敦厚如勃琦汝  
副衍知人予哲惟脩惟靖立朝讞讞言論礫柯忠誠特達  
祿微身賤其志不怯嘗詆大臣亟遭貶黜萬里歸來剛氣  
不折屢進直言以補予闕素相之後含忠履潔昔爲御史  
幾叩予榻至今諫疏在於箱匣襄雖小臣名聞于微亦嘗  
獻言箴予之失剛守粹慤與脩儔匹並爲諫官正色在列  
予過汝言無鉗汝舌皇帝明聖忠邪辨別舉擢俊良掃除  
妖魃衆賢之進如茅斯拔大姦之去如距斯脫上倚輔弼  
司予調燮下賴諫諍維予紀法左右正人無有邪孽予望

太平日不逾浹皇帝嗣位二十二年神武不殺其默如淵  
聖人不測其動以天賞罰在予不失其權恭已南面退姦  
進賢知賢不易非明不得去邪惟艱惟斷乃克明則不貳  
斷則不惑旣明且斷惟皇之德羣下踧踖重足屏息交相  
告語曰惟正直毋作側僻皇帝汝極諸侯危慄墮玉失舄  
交相告語皇帝神明四時朝覲謹脩臣職四夷走馬墜鐙  
遺策交相告語皇帝神武解兵脩貢永爲屬國皇帝一舉  
羣臣懾焉諸侯畏焉四夷服焉臣願陛下壽萬千年

汴渠

隋帝荒宴遊厚地剗爲溝萬舸東南行四海困橫流義旗  
舉晉陽錦帆入揚州揚州竟不返京邑爲墟丘吁哉汴渠  
水至今病不瘳世言汴水利我爲汴水憂利害我豈知吾



試言其由汴水濬且長汴水湍且道千里瀉地氣萬世勞  
人謀舳舻相屬進餽運曾無休一人奉口腹百姓竭膏油  
民力輸公家斗粟不敢收州侯共王都尺租不敢留太倉  
粟義義冗兵食無羞上林錢朽貫樂官求要優吾欲塞汴  
水吾欲壞官舟請君簡賜予請君節財求王畿方千里邦  
國用足周盡省轉運使重封富民侯天下無移粟一州食  
一州

麥熟有感 癸酉中作

去年經春頻肆赦拜赦人忙走如馬五月不雨麥苗死赦  
貧不能活窮寡今年經春無赦書十日一雨及時下五月  
麥熟人民飽一麥勝如四度赦吾願吾君與吾相調和陰  
陽活元化陰陽無病元氣活風雨調順苗多稼使麥長熟  
人不饑敢告吾君不須赦

讀詔書 乙亥中作

關中有山生虎狼虎狼性虺不可當去歲食人十有一無  
辜被此惡物傷守臣具事奏聖帝聖帝讀之惻上意乃詔  
天下捕虎狼意欲斯民無枉死吾君仁覆如天地只知虎  
狼有牙齒害人不獨在虎狼臣請勿捕捕貪吏

三豪詩送杜默師雄 并序

本朝八十年文人爲多若老師宿名不敢論數近世作  
者石曼卿之詩歐陽永叔之文辭杜師雄之歌篇豪於  
一代矣師雄學於予辭歸作三豪詩以送之  
曼卿豪於詩社壇高數層永叔豪於辭舉世絕儔朋師雄  
歌亦豪三人宜同稱曼卿苦汨沒老死殿中丞身雖埋黃



名後詩金  
五  
泉詩名長如水永叔亦連蹇病鸞方騫騰四海讓獨步三  
館最後登師雄二十二筆距獐如鷹才格自天來辭華非  
學能迴顧李賀輩麤俗良可憎玉川月蝕詩猶欲相憑凌  
曼卿苟不死其才堪股肱永叔氣甚閎用之王道與師雄  
子勉旃勿便生驕矜

贈張績禹功

李唐元和間文人如蠡起李翱與李觀言雄破姦宄孟郊  
及張籍詩苦動天地持正不退讓子厚稱絕偉元白雖小  
道爭名愈弗已卒能霸斯文昌黎韓夫子吾宋興國來文  
人如櫛比黃州才專勝漢公氣全粹晦之號絕羣平地走  
虎兕謂之雖駮雜亦文中騏驥白稹洎盧震江沱自爲水  
朱巖兼孫僅培塿對嶽峙卒能霸斯文河東柳開氏嗟吁

河東沒斯文乃屯否汨汨三十年淫哇滿人耳粵從景祐  
後大儒復唱始文人如麻立樅樅攢戰騎徂徠山磊砢生  
民實頑鄙容貌不動人心膽無有比不度蹄涔微直欲觸  
鯨鯉有慕韓愈節有肩柳開志今讀禹功文矛戟寒相倚  
寶光千里高飛出破屋裏龍音萬丈長拔出重淵底雷霆  
皆藏身日星皆失次我慙年老大才力漸衰矣禹功氣奔  
壯今方二十二前去吾之年猶有十四歲今讀禹功文魂  
魄已驚悸更加十四年世應絕儔類卒能霸斯文吾恐不  
在已禹功幸勉旃當仁勿讓爾

西北乙亥中作

吾嘗觀天下西北險固形四夷皆臣順二鄙獨不庭吾君  
仁泰厚曠歲稽天刑孽芽遂滋大地豕極羶腥漸聞頗驕



蹇牧馬附郊垆吾恐患已深爲之居靡寧堂上守章句將  
軍弄娉婷不知思此否使人堪涕零

乙亥冬富春先生以老儒醇師居我東齋濟北張洞  
明遠楚宮李溫仲淵皆服道就義與介同執弟子  
之禮北面受其業因作百八十二言相勉

鳳皇飛來衆鳥隨神龍遊處羣魚嬉先生道德如韓孟四  
方學者爭奔馳濟北張洞壯且勇楚丘李溫少而奇二子  
磊落頗驚俗泰山石介更過之三人堂堂負英氣胷中拳  
拳蟠蛟螭道可服兮身可屈北面受業尊爲師先生晨起  
坐堂上口諷大易春秋辭洪音琅琅響齒牙鼓橫孔子與  
宓義先生居前三子後恂恂如在汾河湄續作六經豈必  
讓焉無房杜廊廟資吁嗟斯文敝已久天生吾輩同扶持

二子勉旃吾不惰先生大用終有時當以斯文施天下豈  
徒玩書心神疲

過魏東郊

全魏地千里雄大視區宇黃河爲血脉太行爲筋裔地靈  
育聖賢土厚含文武堂堂柳先生生下如猛虎十三斷賊  
指聞者皆震怖十七著野史才俊凌遷固二十補亡書辭  
淡續堯禹六經皆自曉不看注與疏述作慕仲淹文章肩  
韓愈下唐二百年先生固獨步投篇動范杲落筆驚王祐  
四方交豪傑羣公走聲譽一上中高第數年編士伍五命  
爲御史連出守方土事業過皋夔才能堪相輔鳳皇世不  
容衆鳥競嘲訴獄中饑不死特地生爪距貌貅十萬師盟  
津直北渡塞上諸猛將低頭若首鼠渴憶海爲漿饑思齧



爲脯兩手拏人肝大牀橫斗肚一飲酒一石賊來不怕懼  
帳下立孫吳罇前坐伊呂笑談韜鈴間出入經綸務  
恨未滅獻策言可慮幽州恨未復上書言可取好文有太  
宗好武有太祖先生文武具命兮竟不遇死來三十載荒  
草蓋墳墓四海無英雄斯文失宗主豎子敢顛狂黠戎敢  
慢侮我思柳先生涕泪落如雨試過魏東郊寒鴉啼老樹  
丈夫肝膽喪真儒魂魄去瓦石固無情爲我亦慘沮

蜀道自勉

潮陽障煙黑去京路八千吏部有大功得罪斥守藩朝衝  
江霧行夜枕江濤眠蛟蜃作怪變時時攀船舷魚龍吐火  
焰往往出波間故爲相恐怖倏忽千萬端道在安可劫處  
之自晏然我乏尺寸効月食二萬錢自請西南來此行非  
竄遷蜀山險可升蜀路高可緣上無嵐氣蒸下無波濤翻  
步覺閣道穩身履劔門安惟懷吏部節不知蜀道難

聞子規

月上半峰峰樹碧子規啼苦月無色壯士耳邊都不聞兒  
女眼中淚自滴古人出處非關身處兮事親出事君服勤  
至死不敢倦避勞擇逸豈所聞我看蜀道誠爲難嗟爾子  
規何云云王遵九折竟叱馭班超萬里圖立勲乘危蹈險  
盡臣節二人至今揚清芬我本魯國一男子少小氣志凌  
浮雲精誠許國貫白日有心致主爲華勲位卑身賤難自  
達滿腹帝典與皇墳有時憤懣吐一言小人謗議已紛紛  
宰相寬容天子慈八年之中三從軍從軍官清吾何苦嘉  
州路遠爾勿語地不爲我易其險我豈守道不能固子規



子規漫啼絕斷無清淚灑向汝

哀隣家

隣家不選醫醫無救病術朝一醫工入暮一醫工出有加  
而無瘳皇皇不安室吁嗟鄰翁愚子爲病者恤醫醫一日  
更千人盲藥何能療沉疾

觀碁

人皆稱善奕伊我獨不能試坐觀勝敗白黑何分明運智  
奇復詐用心險且傾嗟哉一枰上奚足勞經營安得百萬  
騎鐵甲相磨鳴西取元昊頭獻之天子庭北入

域縛

主南行東逾滄海東射破高麗城南趨交趾國蠻子與  
觀迎盡使四 臣歸來告太平誰能憑文楸兩人終日爭

贈劉中都

吾登泰山上下視何紛紛彼角而走者孰爲磨與磨彼茁  
而生者孰爲蕭與芸伯樂不復出駑驥終同羣卞和不再  
生珉玉將誰分吁哉劉中都高標凌浮雲諸侯不薦士外  
府不策勳冉冉趨黃綬勤勞徒爾云我媿勢力小不能叫  
吾君勿改芳蘭性林深須自薰勿隱沖鶴聲天高當自聞

感事

吾嘗觀中夏地平如砥石幅員數萬里車馬知轍迹帝宅  
居土中紫垣當辰極長江斷其南絕塞經其北東海西流  
沙天爲限 三代千餘年天子雖務德實以險爲恃四  
夷皆潛匿漢唐德稍衰地勝豈殊昔暫來還亟去不敢窺  
城壁石晉一失謀六州淪 域天地破扁鑄山川無阻阨  
貽爾子孫患固知非遠策桓桓周世宗三十纂瑤曆一歲



破東河劉崇喪精魄再歲復秦鳳不庭自柔格三歲出南  
狩王師拯焚溺江北十四州取之如卷席四歲征關南曾  
不發一鎊三州相繼降德聲暢蠻貊李昇請臣妾錢鏐修  
貢職帝欲因兵鋒乘勝務深擊直取幽州城拓土開疆場  
重收虎北口復關閉寇賊是時戰屢捷六軍氣吞敵平吳  
如破竹成功在頃刻惜哉志不就暴疾生中夕帝宋承大  
寶聲名發丕赫全蜀獻土地舉吳上圖籍荆潭與甌閩助  
祭來匍匐開城納江俘御樓受晉馘區內一正朔六州獨  
割剔憤憤柳崇儀才宏包且奭生長在河朔耳目熟金革  
旗鼓朝治兵酒殺夜結客握臂說心誠倒囊推金帛客以  
豪傑士遇侯頗感激往來達厥誠生死願効力萬德納我  
說洞然絕嫌隙事成已有萌侯去何云亟豪傑夜空回帳

中屢嘆息我覽此二事天意終難測撫卷一感傷兩睫淚  
潛滴

安道登茂材異等科

嘗言春官氏設官何踞躄屑屑取於人辭賦為程約一字  
競新奇四聲分清濁矯矯遷雄才動為對偶縛恢恢晁董  
策亦遭聲病落每歲棘籬上所得多浮薄嗟哉浮薄流不  
知王霸略六經掛東壁三史東高閣瑣瑣事雕篆區區衍  
述作隨行登一第謂身翦寥廓趨衆得一官謂身縻好爵  
棲棲咫尺地燕雀假安託汲汲五斗米鴈鴛資飲啄壯茂  
張安道少懷夫子學三就禮部試不宥露頭角耻用衆人  
遇羞將一賦較甘心場翼歸志懷本卓犖三賢文章師  
宋公副樞蔡公計相范公連章稱薦儒林推先覺百鳥聲喑喑獨能辨鸞鶯



玉石方混混獨能識至璞薦之于天子此材堪輪奐遂得  
望清光三接近帷幄聲友視萬乘器宇誠嶽嶽願乞數刻  
景古今可揚權縱橫三千言得儻如奪槩上下馳皇王周  
旋騁禮樂遠推災異源上究星文錯直言補王闕危論針  
民瘼天子覽其奏嘉賞為嗟愕既嘆相見晚且言同時樂  
一命校秘書恩澤優且渥追惜漢武世仲舒道磽确再念  
文宗朝劉蕡命蹇剝有才無其時徒抱此誠慤吾君嗣丕  
基百王慙景鑠萬物蒙休嘉四夷奉正朔賢良得其時才  
命不相虛一謁乃大遇君臣無隔膜我賀吾君明取士得  
英卓我賀吾道行逢時不蹉跎行願入廟廊鈞軸在掌握  
上使斯文淳下使斯民樸五帝從可追三王豈爲邈

感興

村居何 適種木樹桑梓田園繞家舍遠不逾十里款段  
足乘騎六步而已矣但識畜駑駘安知有騏驎臘月北風  
寒太行山色紫君命急如火城頭見烽燧雪深馬僵倒十  
夫扶不起軍法有明訓後期者誅死倚鞍思駿骨撫轡念  
綠駟求之不可得殼觫滿眼淚旁聞負薪叟竊語相譏刺  
居安常念危在險如處易臨難始求濟狼狽徒勞爾有備  
則無患古人亟浚旨平居無事時華厩深秘遂善穀與豐  
草秣飼十廐吏駑駘飽相枕素食不知愧伯樂能識馬每  
來如勸說飛兔與驥腹日牽在都市爲愛千金資貪恪不  
宜置今日臨艱難勞力自勉勵

又送從道

常欲飽暖天下人其道未得一寸施子有二親皆七十糠



覈不充常寒饑昨日訪我破屋下具鷄一隻酒一卮子起  
却盤筋不舉吾親未審曾食之對我噓噓涕泗下孝子之  
心真可悲子固與我同一體相間豈復有毛皮顧子之親  
則吾親吾親凍餒無奈何飽暖天下心徒爲送子出門成  
此詩

偶作

晉公平淮西兵出遠如神崇韜伐西川六十日請臣太祖  
初受命諸侯未盡室只蜀廣號敵國荆潭爲疆隣王師討有  
罪不聞逾十旬元且八誠螻蟻有地長一畛詎足污斧鉞尋  
當投荆榛是何逾歲月務行含貸仁豈茲將帥間迥無晉  
公倫張旗發一號豈無李處耘提戈出一戰豈無王全斌  
容茲盈寸蟹蕩漾於流津平生讀詩書胸中貯經綸薄田

四五畝甘心耕耨勤倚鉏西北望涕淚空沾巾

送李唐病歸

春風汝水溫曉日徂徠寒之子銜病歸請予開一言予知  
去病術爲子陳大端予嘗學聖人試將道比論道病非一  
日善醫惟孔韓賞罰絕于周孔筆誅其姦春秋十二經王  
道復全完佛老熾于唐韓刀斷其根原道千餘言生民復  
眠食道病由有弊邪僞容其間身病由有隙風邪來相干  
子欲治斯道絕弊道乃存子欲治子身杜隙身乃安此理  
近古鑒吾言有本源

蝦蟆

夏雨下數尺流水滿池泓蝦蟆爲得時晝夜鳴不停幾日  
飽欲死腹圓如瓶嚙鉅吻自開闔頭項或縮盈時於土坎



間突出兩眼，嗚是何癡形骸，能吐惡音聲，嗟哉爾肉膾，不中爲犧牲，嗟哉爾聲麤，不中和人情，殊不自量力，更欲睥睨橫海之鱣鯨，自謂天地間獨馳善鳴，名萬物，聒皆聾，不知鐘鼓欽欽，雷霆閃閃，應龍戢腦入海底，鳳皇舉翼摩青冥，此時各默默，以避蝦蟇鳴，何時雨歇水澤涸，青臭泥中露醜形，失亦無能爲，兩脚不解行，乾渴以至死，盡把枯殼填土坑。

寄雷澤張從道

不知有六死一室心，恬如臘盡妻未褐，天寒子讀書，澆風與世薄，古道于時疎，事事皆同我，憶君春草初。

訪田公不遇

主人何處去，門外草萋萋，獨犬睡不吠，幽禽閑自啼，老猿

偷果實，稚子弄鋤犁，日暮園林悄，春風吹藥畦。

蘇唐詢秀才晚學於予告歸以四韻勉之

憐我山中卧，半年相伴吟，道傳諸子後，易得數爻深，爨或經年絕，書猶盡日尋，惜哉未終業，親老忽霑霖。

歲晏村居

歲晏有餘糧，杯盤氣味長，天寒酒脚落，春近臘頭香，菜色青仍短，茶芽嫩復黃，此中得淡趣，真不羨膏粱。

送奉符縣監酒稅孟執中借職蜀主之後

東西兩處各天涯，去國還鄉喜又嗟，鄒嶧山藏孟子宅，孟軻後海棠花落蜀王家，深知周道非羹酒，可罪唐臣乞稅

茶三載，此心無一事，聞經絳帳日常斜，事退日就於明復先生問道

予與元均承叔君謨同年登科，承叔尋入館閣，元均



今制策高第君謨後磨礪元均事業獨予驚不因  
寄君謨

網羅當日得英雄文陣三人各立功海裏赤鯨疑有角雲  
中騏驎欲追風尋聞館閣英聲出又見賢良大對通亦說  
年來畜奇業蟪蛄何計逐飛鴻

寄元均

君爲儒者豈知兵何事欣隨壁馬行裴度樽前坐韓愈趙  
成帳下立荀卿禦戎誰道全無策對壘寧妨下一枰須信  
乾坤養不肖年三十七卧柴荆

赴任嘉州初登棧道寄題姜潛至之讀易堂

我不從官君下第其間險易兩何如連雲棧外四千里讀  
易堂中一帙書慈母含飴垂禿髮先生懷道接茅廬莫將

清淚頻頻灑蜀道之難欲上初

左綿席上呈知郡王虞部

王與介前任同在睢陽

何事相逢悲喜并倏然相別二周星主人鬢髮無多白幕  
客襦衫依舊青目極同思故山斷涕危共在異鄉零階前  
絲竹雖嘈雜不似南湖湖上聽

睢陽南湖宴游之所也

士廷評相會梓州

道視荀楊雖未至分如管鮑已知深一千二百日離別五  
十六驛外相尋重欲同君注周易且來共我聽胡琴月留  
屋角不下去似與清風憐苦吟

鄭師易秀才詩奔騰邁壯殆有石曼卿學士風骨作

四韻以勉之

曼卿續得少陵絃絃絕年來又一年驚起聽君諷新句灑



如開集味遺篇一家氣骨疑無偶萬丈光芒欲拂天好向  
風騷尤著意他時三箇地詩仙

留題敏夫隱居

幾迴到此尋逋客杯案蕭疎滋味長山飯半甌椽子熟春  
蔬一筋木苗香四時泉石應無夏滿谷雲霞別是鄉終待  
共君結鄰里竹邊相並兩間房

訪竹溪呈孟節兼有懷熙道

到頭泉石是吾家坐石聽泉日已斜一片青衫非富貴千  
竿綠竹好生涯君曾覽照頭皆雪我試看書眼亦花便好  
結為山伴侶教他夔益佐勳華

招張洞明遠

君言下第我西飛執手都門淚滿衣萬里得歸頭半白經

年相別道應肥火鑽欲遍龜難死竹實猶多鳳不飢暫到  
東山慰愁抱春秋之學說淡微

村居

幽居一畝枕溪稜堦下杉松纏古藤常愛園林淡似隱不  
嫌門戶冷如僧麥宜過社猶催種山近經秋却懶登已把  
壯心閑頓置少年莫要苦相憎

燕枝板浣花牋寄合州徐文職方

合州太守髯將絲聞說歡情尚不衰板與歌娘拍新調牋  
供狎客寫芳辭木成文理差差動花映溪光瑟瑟奇名得  
只從嘉郡樹燕枝木出樣傳仍自薛濤時有薛奇章磊磊馳  
聲價江令翩翩落酒卮幾首詩成卷魚子有魚誰人唱罷  
泣燕枝紅牙管好同林置紫竹笙宜一處施願助風流向



樽席杏花况是未離披司空圖有杏花辭文頃在襄陽多命唱之

送馮司理之任彭州

李白詩中蜀道難把詩試讀淚沈瀾江形詰曲千迴折嶺

路峻增萬屈盤登陟去年腰僅折追思今日鼻猶酸子去

嘉州此行君不同屯蹇五馬相知舊長官彭牧與君常同

赴任嘉州待闕左綿七十日通判呂國博日相從吟

酌至嘉陽因成韻寄之

鼎來豈敢道能詩一見何因便解頤鄉國三千里離別杯

盤七十日相知送人江外馬馱妓垂釣寺中魚竭池別後

中秋又重九與誰賞月詠東籬

泥溪驛中作嘉陵江自天散關與予相別二十餘程至泥溪借寺去因有是作

山驛蕭條酒倦傾嘉陵相背去無情臨流不忍輕相別吟

聽潺湲坐到明



武仲清江集鈔

十三

孔武仲字常父臨江新喻人至聖四十八代孫也舉進士中甲科調穀城主簿教授齊州爲國子直講歷秘書正字校書集賢校理著作郎國子司業論詆王氏進起居郎侍講邇英起居舍人旋拜中書直學士院擢給事中遷禮部侍郎以寶文閣待制知洪州改宣州坐元祐黨奪職居池州卒年五十七與兄文仲弟平仲並有文名時稱二蘇三孔元祐文人之盛大都材致橫濶而氣魄剛直故能振靡復古如三孔者皆文章之雄也然文仲恃才爲蘇氏所使攻毀程子晚知懊恨歐血而沒君子病之集藁罕傳周益公時搜合爲三孔清江集已不可多得矣一言不知令名剝落爲文人者每得罪聖賢



不必爲奸邪而卒不得與于君子豈獨一文仲哉作者  
不可以不慎也因附其遺詩數首於末文仲字經父舉  
進士官至諫議大夫中書舍人

馬齧麥

馬齧麥僕飲水也風軒軒搖丘霖十日吁可驚南山喜見  
朝日升華陽北崖霜泥薄窮臘獨爲千里行五里聊一止  
十里復一息楊柳弄輕黃已作春顏色川原入眼雖似快  
時節公家還可惜齧麥不須飽飲水勿畏寒起鞭移擔復  
五里帝鄉卽在須臾間悠哉役夫勉桓桓征途幾何莫永  
歎亦莫悲歌行路難

兒歸行

竹元珍云澤州山中暮春之月有鳥啼曰兒歸者其聲

甚哀問之鄉民云昔有里婦愛其子而憎前室之子欲  
逐之未有計乃於種麻時熟其半生其半使二子分種  
曰麻生乃得歸而誤以熟者與已子久之所惡之子歸  
而已子不返往視之則已化爲飛禽啼曰兒歸今鄉人  
以爲種麻之時候余以謂人之憎愛藏乎胸中陰謀所  
發乃在分種之際而心手倒錯事與願違朝人暮禽子  
母生隔似有巧者主張斡旋于冥冥之間天網雖疎其  
應甚密則夫爲人上而接其下用心積慮可不戒哉又  
知天之所以垂戒示迹于人者殆將使之推類以自廣  
非獨此一女子也乃作詩以記之

兒歸兒不歸朝爲子母歡暮爲禽鳥飛故居不得返溪林  
安可依此身寂寞已如此我母在家應憶子子今豈不息



其親空有舊心無舊身兒歸兒不歸春已暮朝多風夕多  
兩山雖有泉隴無黍兒寒有誰訴兒飢與誰語萬物卵翼  
皆相隨兒今不得兒子母兒歸兒不歸年年三月種麻時  
此聲煩且悲聞昔一母而兩兒子已所生獨愛之麻生指  
作還家期唯憎者來愛者去物理返覆不可知天公豈欲  
故如此善惡報敏如墳窟至今哀怨留空山長爲鑒戒子  
母間豈獨行客愁心顏兒歸摧痛傷心肝

車家行

上坂車聲遲下坂車聲快遲如鬼語相喧啾快如溪沙瀉  
鳴瀨一車人十捧擁行江南江北不計程青天白日有時  
往無人止得車輪聲晚來驟雨聲濯濯平曉郊原盡溝壑  
方悟車家進退難不如田家四時樂

猗猗堂下竹

猗猗堂下竹我來初萌芽生意甚蹇薄纔能出泥沙狂霖  
一夕作霹靂連轟車回首未幾日其成何速耶脩然數尺  
高秀色蔚以佳餘陰過盆池喜躍見魚蛙乃知地道敏不  
待歲月賒念彼遠遊子聯翩入京華勢利勇奔趨被服爭  
豪奢外雖逐喜好顧眄相陵夸中乃昏智識有損無增加  
曾竹之不如徒此草木花經風已簸落枯稿良可嗟而我  
方涉世浩渺無津涯因竹亦自悟慨歌牕日斜

與廖開甫自淮南同行赴舉相別五年復相遇於新  
水縣爲詩贈之

來書吾初走夷門傾蓋得君恨不早蘭溪駐馬復相逢二  
紀飛馳如電掃惜君憔悴力不任顧我滄浪髮先鬢憶昔



同行氣頗驕青驄馬快鞍韉好荒山破屋風豪橫大澤長  
堂雪傾倒高談灑落見天機健句縱橫瀆腹藁辛勤始得  
到京邑文辭不入春官考可憐六翮委沙泥坐看羣仙上  
蓬島壯年多難寸心折勁鏃已衰難破縞而君施設有餘  
才西佐元戎奪城堡牛刀拂拭試一懸如引滄溟灌行潦  
歸來赴愬天子庭正欲披腹呈瑰寶片辭未吐疾先入藜  
杖扶行色枯稿籃輿復指天涯去長川橫濫聲浩浩驛驢  
不日歸王閑那久低摧卧霜草

久長驛書事

空堂淡淡閃燈燭羣奴鼾眠聲動屋豆肥草軟馬亦便嚼  
美只如蠶上簇天事由來不可量初更月出星煌煌須臾  
變作霏霏雨客枕不眠知夜長

題鮑家鋪

郵亭秣馬朝寒天雪壓山山湧泉隴頭客飢欲噤口屋  
底人閒猶鼾眠敲門得薪感相濟征衫如洗賴火然江南  
亦有安棲處却羨郵亭人穩住

舍驕馬而步

嚴風駕雪霜吾驕頗溫燠白日煖郊原吾馬快馳逐二者  
皆得用翩如兩黃鵠馬驕倦提策驕狹厭攀束何以救斯  
弊奔馳有吾足副之兩革靴隨以一筇竹鳧趨上高岡虎  
步出平陸折花得低枝照影臨溪谷道逢田間叟時訪以  
耕牧北音稍入耳俚語俄滿腹行行及前堆小汗已霰霰  
芳草可爲茵吾眠不須褥人生忘太佚終歲居華屋醉飽  
耳目昏軟暖筋骸縮今吾異于此千里干微祿朝隨麀麀



騁夜侶鴻雁宿戶樞勞乃久金礦鍛方熟聊歌以自娛不  
作楊朱哭

送李大夫管勾太平宮居袁州

康定慶曆披羣英公爲布衣歌太平熙寧元豐王道興公  
作太守逢休明四十年間走四海崛然不肯干公卿峩峩  
正議天柱壯皎皎素節冰壺清習中慷慨外間易年高未  
見白髮生罷節巴陵歸意銳奈何忝就不敢輕馳歸天寵  
乞閒散諸郎惜祿猶屢爭毅然不與兒女計飛章丹扆論  
赤誠明朝果得琳宮去匡廬山色遙相迎玉溪氣象自瀟  
灑新磨古鏡當霄橫脩篁萬竿飽霜雪枯碁一局酒滿觥  
時邀賓朋叙野史間擁雪鶴登巖扃妄排丹鼎夜不寐避  
逅黃金燒可成未應謝傅入滄海行見盧敖朝玉京

代簡答次中見語

詩誇洞庭湖蓋舉其粗爾自此稍南行更有瀟湘水瀟湘  
如此流淺淡清見底吾邑在其旁桑麻百餘里民經南巡  
後淳龐猶可喜白酒日相 鱸魚夜成市念方從吏穩小  
官不爲恥先期了賦租隨時用鞭箠此外無餘事看山聊  
隱几還作小詩篇奇聲前御史御史吾故人風義今爲偉  
超遷未復甚久仆行復起但使交期在不須論遠邇今夕  
宿朱僊相望月明裏

入關山

輕輿兀兀乘朝暉漸入山徑行逶迤昨日喜與山相見今  
日得與山相隨山中老翁迎我笑借問久矣來何遲答云  
王都富且樂四方車馬皆奔馳我雖疎慵亦勉強天恩得



邑方南歸山林市朝不同調公雖高簡宜無譏老翁聞語  
更驩意爲我煮水燒松枝山家十錢得升酒勸我引觴聊  
沃飢爲翁一奏白雪曲翁亦爲我歌紫芝此聲淡泊極有  
味往往世俗無人知山中之樂有如此嗟我捨此將焉之

新安鋪三首

罩罩澗中草泠泠山崦泉泉甘而草芳旁有屋數椽夕陽  
漸近西風起行客山頭望千里  
薄雲斜日亂山川投得荒亭晚息肩地僻誰知藏好景庭  
前花數折金錢  
簞如秋水憇廻廊素月分輝百倍涼山木交加無意緒故  
欺殊影到人牀

宿天池

我思廬山遊發興自年少偶來得閒侶更欲窺衆妙幽林  
穿濛籠青峰上嶮峭遙看天池路一線在巖微辛勤得至  
此慘寂已西照雲池桂無根瞪視心膽掉暮夜煙雲昏西  
巖亦登眺聖燈稍稍出弄影何窈窕一枝分百點變態不  
可料須臾歸寂滅何處觀朕兆僧房得棲宿爽氣冰毛竅  
翻然亦興盡却恨歸途寫納懷道隆師確不奉明詔似與  
山間石慙慙論久要我今來時迺繡灰真可笑明朝指誰  
谷裏足登涼轎時足涼未愈指却壁上名恐爲高人笑

尋真觀

武皇車駕東南出訪道求仙希萬一屏風九疊雲物清意  
恐神仙藏此室羽章之館締構新壇塲夜夜祈星辰蓬萊  
縹緲不可到橋山一閉逾千春詠真之天在旁側白晝潭



心飛霹靂田收歲美龍亦閒唯有濟滄照空碧誰道尋真  
是女郎朝飡松桂夜焚香明眸綠鬢今何在意已霞衣侍  
玉皇

松上老藤 在二聖寺

古木已昂藏長藤亦奇怪潛根蒼蘚中矯尾青雲外巖巖  
秋霜剝悠悠夏景曬摧殘復長養鍛鍊成老大蛇蟠筋脉  
壯龍死軀殼在他時雷破山大雨灑滂沛茲松若變化無  
乃遭結 附枝物所患奪朱古爲戒何不淬斧斤誅鋤此  
蕭艾

高臺歌

廢地積爲冢昔曾遊宴來冢廢無子孫東家砌成臺臺雖  
平方冢雖秃物理廢興有往復相逢莫喜亦莫愁乘興且

同臺上游

賦張芸叟蕃刀

王師前年下靈州先生奉詔爲參謀軍書堆案不足道欲  
斬名王懸髑髏官供器械如山積裝結雖巧體質浮傳聞  
蕃刀最可用買置不惜千金酬沙河洗滌血痕盡瑩若一  
水橫清秋長庚輝輝奪明月光景迸溢不可收軍回倉卒  
未及試提挈萬里來荒陬空齋倒掩閱圖史淡林永日號  
猩鼯揮鳴且欲驚暴客敢議與國平寃讐夜郎蒙恩放李  
白炎嶺得旨還幽求輕舫共泊長沙岸幾日對語清湘樓  
紅蓮幕中邀客飲霧雨咫尺迷汀洲雜花落盡無處覓官  
妓遣歸不敢畱清歡未免假外物共說鐵劔勝倡優君家  
所寶世稀有滿坐傳看驚殊尤護之太過却銹澀頑蘚鬱



結纏蒼蚪橫磨十萬祗虛語得此已足馳燕幽今公又應  
元戎辟真能寸截鯨鯢不鄰生入幕宜有畫定遠出塞將  
封侯我今喜得隨君公長江渺渺平天流路危或恐逢水  
怪尾脊崔嵬當吾舟煩公一效飲飛勇爲公椎鼓傾金甌  
張秉叔出紫雲回鑿圖以示坐客因爲賦之

開元太平無兵戎真人味道希夷中人間之樂已饒足唯  
有青霄未追逐坐中誰似葉先生以氣爲糧常辟穀朝登  
員嶠夕崑崙只與神游不要人忽逢邀攜看月去縹緲虛  
空生紫雲蟾宮竟不容久住仙藥飄飄送回去歸來宮漏  
未移更甲帳明紅宛如故汾水悲歌仙不成梨園空沒有  
遺聲紅塵如海漲朝市從此無人遊玉京

祠二廟之明日未得順風呈同行

岳州西祠從古有控帶洞庭湖之口前對隱顯明滅之湘  
山下接淵淪洶湧之長川茫茫白沙連絕嶼淡淡古木蟠  
蒼煙昭靈王左安流右翠帳朱幡擁前後鋸牙虎視森兩  
廂氣骨生憐欲奔走我來纜舟日已昏袍鞞跪聽祠官言  
伏興進退如法式四顧詭譎驚心魂平明結束舟將解叱  
吸仍聞北風大焚香奏酒殊無計伏渚藏汀姑有待二王  
威神世所傳鈴攝鬼怪賓靈仙好風相送勢不難舒卷造  
化須臾間波回草動似有意舉棹開帆卽千里吟詩賞月  
岳陽樓買魚沽酒巴陵市

廟下候風呈同行

楚水千百源洞庭爲壯觀勢居七澤右地裂荆吳半而我  
泛扁舟飄然一歸鴈來之豈爲益亦未足算胡不吹清



波縱發如飛翰朝辭廟山曲午泊巴陵岸况有三面風迎  
送俱無間定非偏薄厚以撥行旅訥奈何苦流滯兀兀晨  
復盱采芹朝當蔬伐竹暮供爨舟師三十人餓虎奔芻豢  
使之裹糧絕慮有探囊患二王東南望貌像頗輝煥歌鼓  
歲無休香燈夜侵旦我爲江湖士乞靈從弱冠四到祠宮  
下霜鬢今已粲王其故舊卹勿以塗人看尊師况慈忍善  
道陰有贊王心或未回師賴固宜緩林蛟似見許歸來整  
檣慢

炭步港觀螢

九華之南蘆葦長流螢夕起不計雙爛如神仙珠玉闕青  
羅掩映千明缸空江沉沉未見月近浦穿林起還滅魚遊  
鳥宿自不驚我知此火初無情

泊趙屯

憶昨省覲趨濡川蒸衣擁綠方少年艱難險阻俱未歷孟  
浪勇決唯爭先舟發趙屯猶未飯有風北起空濛間掀搖  
三山欺五岳巨浪倒潑東南天千林向人俱頓仆兩岸過  
眼真飛鷲帆檣廻戛河漢底鷁首俯飲蛟龍淵跳波濺沫  
來四面坐中時得鯉與鱣妻啼婢訕殊不顧兀坐正讀道  
遙篇爲言方破萬里浪不爾提月爲神仙江中逢巨石頗  
突爲引牽逡巡水勢亦平緩幸免肝脛輸烏鳶暮投彭澤  
宿荒草神驚魄顛何能眠自茲稍悟垂堂戒鞶紋纔起不  
敢前矜持太過僅無患往往所至傷雷連乃知老謀與壯  
事心膽殊異難兼全重來此地畏洶湧藏舟別浦看漪漣  
魚跳鷗下自可喜何用蛟鱔飲流涎斜陽依依照草木夾



岸葭菼鋪書瓊兒今弱冠昔何有昔額無鬚今皓然二十  
餘年纔瞬息時事幾蛻如秋蟬區區走俗亦何賴安得尺  
地巢林泉

清溪詞

譙門之南溪水長斜暉倒閃青銅光下與長江作支股愁  
霖漲天江潦黃江潦黃入清溪清溪到底終無泥還如初  
出秀山時

瓜步阻風

昨日焚香謁聖母青山鞠躬如負弩但乞天開萬里明埽  
去浮雲戢風雨謂宜言發卽響報豈知神不聽我語門前  
白浪如銀山江上狂風如怒虎船癡艣硬不能拔未免樓  
遲傍洲渚輕盈但愛白鷗飛顛頓可憐芳草舞三江五湖  
歷已盡勢合平夷反齟齬上水歌呼下水愁北船縈絆南  
船去寄言南船英雄豪萬事低昂如桔槔我當賣劍買牲  
牢再埽靈宇陳肩尻黃金壺樽沃香醪神喜借以南風高  
揚帆拍手笑爾曹不知流落何江臯荒洲寂寥聽怒號

賦碼礪笛

弟毅父所藏也

羌兒吹笛作龍吟中有太古之純音伊人已死笛仍在手  
古月明江水淡誰知巧匠尋山谷蹙踏溪雲採明玉雲容  
之黯淺紫輕紅花映雨正聲隱顯初無端造化推移  
指法間黃鐘妍美霜朝暖無射淒涼暑月寒輶車走遍天  
南北此笛此聲何處得韜之湘竹川錦囊廣坐聊持街賓  
客弘農學士九尺長頰巖山起髯髯張從容奏罷陽春曲  
氣衰坦腹眠繩牀由來雅器自有合不與教坊管絃雜君



不見開元名臣宋待中手揮羯鼓疾如風

送范中濟侍郎知慶州

平時廣朝中相見輒歡喜昂藏八尺身所負必奇偉四方  
欲善敗軍國盈虛計叩之如川流滾滾不知已天子曰汝  
能吾臣鮮其比而况所設施粲在邊鄙西未純一汝  
可三軍帥擒之或縱之高枕惟爾恃公拜稽首歸眉目凜  
生氣頑童玩天恩參餐若驕子欲痛以鞭笞而畏啼不止  
二者不兩全在所以節制又如畜狂犬繫頸不繫尾收其  
要害處進退隨所指重城徹關沙漠淨如水辭別不躊  
躇安邊從此始

江豚詩四言

黑者江豚白者白鬣狀異名殊同宅大水淵有羣魚掠以

肥已是謂小害顧有可喜大川夷平縞素不起雨雨出沒  
矜其頰鬚若俛若仰若躍若跪舟人相語驚瀾將作亟入  
灣浦踏檣布筏俄頃風至簌山搖岳浪如車輪氛霧相薄  
舟人燕安如在城郭先事而告昭哉爾功鰐啗牛馬頭鼉  
象龍暴殄天物安得爾同于人無害所欲易充暴露形體  
告人以忠又多膏油以助汝工江湖下貧機杼以農鳥鵲  
知風商羊識雨大厦之下風雨何苦豈知舟航方在積險  
以爾占天著蔡之驗古之報祭不遺微蟲孰揚爾烈登薦  
蜡宮世不爾好復惟爾惡我作此歌爲昭其故

堤下

堤下人家喧笑語高揭青帘椎瓦鼓黃流滾滾經簷堯一  
任征夫作舩苦綠榆覆水平如杯前灣旋放水頭來淡如



怒虎著船底玉石齶相喧騰黃河雖斷隨渠急舟楫舒  
遲行旋濫獨上平堤望遠天衣裘已畏西風入

汴河

磬渠斜與昆河接河遠渠慳幾可涉狂霖一漲高十尋迅  
瀉東來比三峽崩騰下與淮泗會清泚亦容伊雒雜橫空  
九關真垂虹怒捲千艘如敗葉祗堪平地看洶湧何事乘  
危理舟楫共夫鵝鶴行天上遙與谷中相應答但憂心手  
一乖迂巨舶高檣兩摧折而余進退久安命揭厲以望初  
不懾妻孥亦已慣江湖笑語猶如泛山陬鳴弓擊柝驚夜  
盜掘如榜鰕佐晨饍時登絕逕步榆柳或面荒陂看鳧鴨  
我生東南趣向野揮弄清溪看蒼雪枕流漱石真所便履  
濁凌險終未愜觚稜漸喜金闕近釜甑何憂米鹽乏渾如

海客泛枯槎繚繞明河望閭闔

閣下觀峴山圖

峴山巉巖清溪濱倒影萬丈之瀟淪往歲嘗有去息吏熱  
地尤多高蹈人少年仕宦頗落魄時登絕嶺攀蒼冥幽花  
美草頗娛目斷碑刊碣還傷神曉猿夜鶴輕相別從此奔  
走十八春舊遊不復齒頰挂方知到骨俱埃塵麟臺昨日  
見圖畫醒若楚客還羈魂方嫌一幅論萬里秋江綠水何  
鄰鄰人心與物本無別正爲利欲相埋湮神功妙手如喚  
覺滿座風月來相親騎驢徑去自可到猶愈縹緲邀西遊秦  
剩沽宜城醉其下夕陽倒載望冠巾

食冰

冬冰冽冽雖可畏夏冰皎皎人共喜休論中使押金盤荷



葉裏來溪宮裏習煩肺涸聊一蘇任爾青蠅相趁死經時  
不壞已可憐濟物之功尚如此人言霜雪比小人我謂堅  
冰似君子

愧魚亭

昔聞魚可羨今見魚可愧邂逅臨池處瀟灑出塵意秋風  
八月起江湖水染紺碧霞綺疎悠然掉尾波間去須信人  
生不及魚

子瞻畫枯木

寒雲行空亂春華西風凜凜空吹沙夫子抱膝若喪魄誰  
知巧息中萌芽敗毫淡墨任揮染蒼莽菌蠢移龍蛇略增  
點綴已成就止見枯木成槎枒更無丹青相掩翳惟有口  
鼻隨穿呀往年江湖飽觀 或在山隈溪水涯腹中空洞

夜藏魁嶺頂突兀春無花徑淡最宜繫畫舸日落時復停  
歸鴉蘇公早與俗子偶避世欲種東陵瓜窺觀盡得物外  
趣移向紙上無毫差醉中遺落不祕惜往往流傳藏人家  
趙昌丹青最細膩直與春色爭豪華公今好尚何太癖曾  
載木車出岷巴輕肥欲與世爲戒未許木葉勝枯槎萬物  
流形若泫露百歲俄驚眼如車樹猶如此不長久人以何  
者堪矜誇悠悠坐見死生境但隨天機無損加却笑金城  
對宮柳泫然流涕空咨嗟

高樓行

天悠悠雲羃羃半夜微聞奏笙笛爛彩蹙飛仙鷁雜戢其  
翼高樓百尋 大途東臨紫垣望青都中山黃封 壺  
五陵豪來少飲娛夷門帝家盛遊樂奔走環觀溢城郭如



今吏橫索錢縱飲誰愁家寂寞

平陽歎

壞雲如山壓齊壘六軍顏色如灰死高郎元自解琵琶萬  
歲無愁作天子伯升何曾上青天濺血遺痕芳草間長城  
萬里自推仆駿馬只馱馮小憐姦臣百計爲蠹賊不但妖  
娥解傾國熊羆哮鬪蹙平陽馮妃對鏡嬌權妝死生契濶  
不相棄雙雙刎頸長安市

歸舍吟

長堤夾天溝浩蕩東南流上有騎馬客枯髯清兩眸馬後  
無飛蓋馬前無鳴騶進無趨退無輕俠遊攜金入市  
賣十鋪不一售包裹却歸舍置之牀一頭半夜光滿屋潛  
知是精鏐貴物莫賤貨不如淡巷收一旦遇知者堆斗價

可求寄謝路傍子神珠難闍投

龜石

平川洶洶經南國疋練橫拖半天碧洪濶巨浪之中央忽  
見頽嵬太古石此石由來幾許時混元一氣初開闢神功  
割破混沌胎劃落半空隨霹靂非鼇非鼈不可辨有若神  
龜見蹤跡精剛不待媧皇鍊渾朴寧從巨靈擘我知神物  
本天性推移運轉非人力當時大禹走天下驅至九江爲  
納錫萬牛攢車載不動鐵軸崢嶸自堆積秦皇鞭山移四  
海怒視不能移咫尺至今獨立猶驚人地志山經不能測  
千靈萬收誰復知一片堅頑粗可昂頭突出翠濤中跪  
足橫躡九泉脉豨鼓縱橫竇穴穿當心一搭莓苔黑淵潛  
不見曳尾狀日爍猶驚負圖色青髯剝落向何處秋草綏



綏神露滴勁健曾支玉女牀爛斑似點垂龍額漁翁未網  
先自駭靈著欲伏安可得鼃鼃縮首不敢近蝦蟇巡行夜  
戰惕歲冬大寒百聖伏圖勁 勢無欹側風磨霜鍊無日  
休髮鬢皴痕成兆拆負才不免刳腸累至珍惟藉天公惜  
灼以炎皇之火精釁以少昊之金液神鑽鬼卜不見形陰  
陽造化無遺策大哉龜者物之精歲久已化爲真形有時  
月黑無人夜繞岸光芒芒自生下駭深潭怪蜃窟上應中  
天玄武星萬象森森下相向來決吉凶真偽情姦狐妖鼠  
已破膽山魃野魅見亦驚波神吞氣不敢喘四面長漪鋪  
席平吾聞溪老記往歲半夜風雨來冥冥剗然曳轉大潭  
左百里震驚如雷霆 憎摧折雖萬狀崔嵬孤高終自靈  
吁哉天地至奇物何爲流落於江城銅馬猶聞標漢殿神  
羊昔亦馴堯庭便當推置玉堂上古貌岌岌無欹傾姦臣  
猾豎作狐媚見之頰面先吞聲凶荒水旱必可卜倉卒變  
怪皆先明 喪魄萬里外情縮不敢窺天兵龜乎龜乎  
用不用壯士與爾同死生

發王務

曉隨燈火背千家落盡疎星見遠霞一餉春聲回宿鳥半  
天寒色在啼鴉臨陂弱柳猶藏葉當路殘梅已盡花賴值  
時光正妍潤穩看風物到京華

發蔡州

悠悠清曉歷長陂楊柳溝塍鴈鷺池風色著人寒料峭日  
光生野暖融怡鶴歸雲海心空在鴈度湖天力已疲客路  
馳驅元不定西遊應有再來時



書事二首

路逢行客向江州，勒馬荒郊爲少留。  
家事滿懷無紙寫，好將言語付蒼頭。  
北來煙燹苦淒涼，金籠崢嶸突尾長。  
滿篋香秬無處用，郵亭一飽待桃榔。

和竹元珍夜雨

帝城塵土熱如湯，喜有殘宵雨送涼。  
旅枕夢雲縈宋玉，空階詩思感何郎。  
香迷舊理煙初斷，燈倚輕寒焰不張。  
明日御溝應更好，一番晴色弄垂楊。

旅枕

旅枕春風底，儵然一夢驚。  
漏移清禁遠，天入小窻明。  
程玉梁園費，山椒楚客情。  
蕭條過百五，猶有賣花聲。

呈竹元珍

一室蕭然傍禁城，塵埃不到旅懷清。  
水流紅片知花落，雨浥蒼苔見筍生。  
感物已憐春寂寞，辭家億是歲崢嶸。  
知君亦有淹留歎，歸夢西隨杜宇聲。

經父云自到京止得一書頗懷憂想因寄

萬事崢嶸不自由，年來書信最綢繆。  
鴈飛玉塞無多地，人望神都正倚樓。  
祗恐邊風多浩蕩，故令音驛每遲留。  
何如款段相隨出鄉曲，長爲馬少遊。

贈程壞

識盡公卿更食貧，蒼髯瘦骨走京塵。  
高談亦與時多忤，屢中方知術有神。  
前會渺茫渾不記，遠遊蕭索復相親。  
疑公別得壺中趣，回首人間二十春。



題報慈寺花藥園

少時隨衆蹂京塵曾倚朱欄看晚春二十年間頭半白方知花木解磨人

羅港

八節灘頭駐馬蹄淙淙流水日沉西歲時久已成陳迹風景全然似此溪蘭棹倚洲人競過籃輿索筆我閒題桃源仙境今何在懊惱嬌鸞向暮啼

過馬鞍山

足歷黃州百疊山更無平地只岡巒物皆枯槁非人世石最崔嵬是馬鞍畏日流金紅豔豔亂沙堆雪白漫漫崎嶇出盡脚休息喜有松聲六月寒

君衣自西林還城中以詩爲別

天上優遊侍從臣還鄉畫錦坐生春不矜富貴知餘事同訪溪山有故人方外笑談無畛域雨餘泉石長精神西林路口嗟輕別善護青雲萬里身

入山三首

冠蓋成陰中路迴獨攜蓮社道人來千巖萬壑初相識分付晴嵐面面開  
路出西林興倍長輕衫短蓋入秋陽層崖蔽日多清影溪谷迷人有異香訪古不辭穿絕磴參禪直爲遍諸方此身似是遼東鶴偶逐飛雲到故鄉

十歲不出還可嗟經旬遍走梵王家羣山拍手向人笑方朔今來何晚耶

黃州



客路深秋一轉蓬  
淮天牢落此將窮  
城開雲水蒼茫處  
人在茅簷掩映中  
對岸武昌風月近  
千年赤壁是非空  
愁愁陳迹慵開口  
謾把筠竿伴釣翁

吳章嶺作

廬山北轉是吳章  
巖草紛紛靜有香  
洞口流泉似相送  
人間天上莫相忘

晚登庾樓

却從江漢望江廬  
湓口風波日愈疎  
滿甕尚留桑落酒  
登盤今有武昌魚  
斜陽柳色明碕岸  
纖月波光濕太虛  
鸚鵡洲前弔豪士  
重將詞賦爲君書

蘇子瞻雪堂

古縣東邊仄徑開  
先生曾此斲蒿萊  
鸞鳳一去應不返  
花

柳當年皆自栽  
畫壁蒼茫畱水墨  
朱欄剝落長莓苔  
鄰翁笑我來何暮  
檢點風煙興盡回

鄂州

綠柳陰陰蔽武昌  
汀洲如畫引帆檣  
一江見底自秋色  
千里無風正夕陽  
暫別勝遊渾老大  
追思前事只淒涼  
賢豪况有遺蹤在  
欲買溪山作漫郎

蕭灑堂

旅平凹 剪荆榛  
畫棟明窻學隱身  
政簡琴書聊度日  
地閒花木爲畱春  
一盃濁酒迷今古  
五字清吟泣鬼神  
暫伴登臨對佳景  
衣襟渾覺減埃塵

湖山亭

縣山峻絕有新亭  
公退時來看洞庭  
天外微茫二湖合  
波



心縹渺一峰書非時爽氣生雲雨永夜寒光浸斗星千古  
登臨增健筆投文猶可弔湘靈

五鼓乘風過洞庭湖日高已至廟下

半掩船篷天淡明飛帆已背岳陽城飄然一葉乘空度卧  
聽銀潢瀉月聲

南津灤濤夜風微投曉湖靈更發機想像虛空聞帝樂凌  
巡波浪匝天圍三湘路指平蕪轉兩舸帆爭白鳥飛却上  
叢祠薦牲酒荆雲隱隱尚朝暉

城上亭上

更無人跡逐攀躋廬岳烏藤手自攜滄海誰論六月息茂  
林今得一枝棲幽芳滿徑春難老翠樾連雲日易西况有  
北郊宜曠望八餘聊此發醯雞

輶車館

野濶天長入望青眼中虛豁到鴻冥偶同楚俗來同樂下  
視湘江笑獨醒風緊水光時感練日斜山影半迴屏扁舟  
過此方年少老矣重來鬢漸星

湘潭

祿仕飄然寄楚鄉才能苦短志方強已栽綠柳如彭澤况  
有黃金似櫟陽風颭湘波天影動雲來衡岳雨聲長尚疑  
早濕難安處更起西邊百尺堂

九月二十二日西館雨中作

西館蕭然擁扇裘渾無桃李似潘侯路多綠竹遮欄雨池  
有殘荷掩映秋蠻獠謳歌逢樂歲江湖風景憶扁舟衣冠  
到底爲身累祗慕逍遙寄一丘



寄范清老

日挂西南有薄輝  
稜稜霜氣犯寒衣  
不愁斗柄隨春轉  
祇怕梅花學雪飛  
湘浦波光頻送別  
湓城山色屢思歸  
高入只在南坡住  
好共留錢買釣磯

湘上

南歸曾泛碧湘船  
擊伏臨流似浩然  
平野幾枯殘  
歲草綠波猶浸舊  
時天簿書倥偬嗟  
巖邑樽酒歡娛憶  
少年尺水片雲今  
我有亦當風月為留連

寄劉貢甫

秀水先生今傑才  
崎嶇山徑滯蓬萊  
飛屐岳麓吟秋草  
把酒襄陽醉臘梅  
東郡政聲無豈弟  
南樓風月且徘徊  
朝廷選用多英俊  
早晚劉郎卽到來

自寶豐倉歸

岳雲成凍把春寒  
十里崎嶇倦往還  
馬上朔風回繫帶  
雪中微酒見開顏  
含黃欲坼江邊柳  
蘸綠相重水上山  
拋掉一官如糞壤  
好隨魚舸此中間

與陳董二君相會于真州經月甚樂詩寄董陳君兼感存沒

平生交友半成塵  
想見當年樂會文  
別淚茫茫添海水  
愁懷黯黯塞江雲  
青衫脫去誰同老  
白首追隨尚有君  
官暇更將碁子學  
他時籌局當功勳

讀王逢原文奇其才擇其精錄一編

人喜相知自昔然  
况君埋玉未多年  
雄文一讀千行淚  
青眼相期萬古傳  
已掇條枚收美實  
更披沙石貯清泉  
東齋



倒掩無人語火煖燈明手自編

次韻和鄧慎思謝劉明復畫道林秋景

鈴齋清話未更端一掃禪林景趣完  
縹渺已裝新殿塔縈紆仍引外峰巒  
冷風有意生空澗密雪無聲下廣寒  
平昔所遊今在眼淒涼疑是夢中看

和李時發春日見寄

聞道重湖路未通悠然身在碧湘中  
崎嶇水國猶千里牢落春花已半空  
江浪濺寒侵小睡岳雲篩雨響疎篷  
君詩亦說清幽趣便覺年來氣味同

登湘陰北寺江亭

古縣峩新剎孤亭占上頭野苔侵坐綠  
江水帶天流絲斷湘靈瑟蕝荒帝子洲  
人寰真似夢頃刻已千秋

辭三妃廟

盤空鳥鵲噪叢祠船上行人半起時  
殘月濛濛傾島嶼南風嫋嫋透旌旗  
開帆便欲日千里別廟仍澆酒一卮  
岸芷洲蘭俱可薦新聲翻入九歌詞

過洞庭

朝來四境宿雲披漸放扁舟入渺瀰  
漠漠衣襟凌水霧悠悠簾幕挂天絲  
波平自喜看書穩風軟翻愁出險遲  
今夜君山興不淺登臨應及月明時

登涵暉亭

常時洲島隔波瀾故覓君山直上看  
菴畫園林春減色水晶宮闕畫添寒  
州城斜引羣峰小湖面平吞數驛寬  
坐久西風響喬木扁舟思到武陵灘



登齊山

路出南堤息灑然烏藤點點破苔圓山腰仄塞元無路洞  
底虛無別有天六月清風醒客醉千叢怪石伴僧禪近人  
登覽方為貴從此匡廬不直錢

銅陵縣端午日寄兄弟

柳浦移舟帶雨行奔波南北是平生忽驚佳節臨端午還  
記當年客禁城丹杏飴盤淡簇火碧醪傾盞釀堆錫菖蒲  
角標俱如舊何事樽前醉不成寄經甫

南北飄然各轉蓬佳辰無路笑言同銅壺縣冷更微雨白  
鵲樓高來遠風粽剝雪膚明席上酒傾玉骨映盃中區區  
羈旅無歡笑遙想華堂屢一烘寄季毅

清涼寺

白寺荒灣略艤舟攜筇來作上方遊何年巧匠開山骨自  
古精兵聚石頭故壘無人空向久高堂問話凜生秋雲庵  
快望窮千里一借澄江洗客憂

繫舟長蘆作

夜泊長蘆星滿川晚來吳楚氣昏然雲雷相會還成雨江  
海交流獨艤舩廢室與人喧白浪荒村何處起青煙文書  
滿眼從拋棄却倚蒲團學坐禪

宮詞二首

十頃西池碧近天春深調馬教龍舩至尊勤政歡嬉少企  
望鑾輿又七年  
雲霧猊香錦繡帷千官重列序賓儀欲知湛露零蕭處盡  
在天杯側勸時



草石寺

寺有潘闔題壁權德輿吳昇坐記

高士去已久餘踪猶可知竹陰侵晏坐山影在平池塵蝕  
參軍墨苔侵相國碑漫尋瀟灑趣俯仰愜心期

借竹

并引

東齋有竹數竿翠蔚可喜其旁衆筍附生漫益淡茂最  
後出者尤若奇特無不應意解籜未盡而爲老兵手折  
之悲夫以干雲蔽日之勢而摧于牕戶之下以凌霜冒  
雪之姿而失於俄頃之間環步往來悽愴良久不能忘  
情旣而自譬解以爲陰陽之化育天地所覆載孰非假  
妄自四肢百骸外至耳目所接諸物若器皿若室屋親  
愛之聚輿馬之隨孰能固守而終全之其會合出於暫  
然至於離散壞熄此理終在何獨一竹可傷而介然于

懷乎乃頗能自遣而宥役兵之罪然後一到其下則初  
心還起不能平也余真大惑者歟抑物之難得而可愛  
當然者也姑置其說寓之以詩

老蘚墻陰夕照間何人折我翠琅玕卽之綠葉隨塵化猶  
有低枝帶露殘不放雲稍侵霰雪因嗟世故足波瀾故園  
未乏簣簞品十頃繁陰六月寒

贈夢符朝議

玉溪在夢符宅後

人笑公衣不浣濯我憚公心霜雪明青山仕宦有真烝白  
首鄉閭無惡聲相逢回首又再歲暫去還來觀太平何事  
南歸太果決蕭然遠作玉溪生

送望聖監南嶽廟

還鄉同赴紫宸朝笑語從容慰寂寥白髮侵凌今滿鑑青



春羈旅舊連鑣易江小隱西園在湘浦新除道路遙老境  
不堪論契濶東風官柳亂堤橋

遊凝祥池同晁無咎作

平時念江國此地愜幽情楊柳繁無路鳧鷖遠有聲郊原  
斜日下襟袂好風生把酒須拌還家下隔城

遊洪福寺

清晨戒童僕馬匹出皇州欲探逍遙趣因成爛熳遊藤蘿  
回晝暝雲雨送春愁傍近緋桃塢尋春亦少留

遊州南同文潛作

峩峩宮殿列仙居溪水方圓氣象殊萬里舟船會京洛幾  
人詩酒到蓬壺日斜清弄來幽谷風定蕙紅滿綠蕪語罷  
恍然真夢幻不應天色有江湖

館中桃花

蓬壺淡絕鑠芳菲初見仙桃第一枝天近自應風景別春  
長莫恨化工遲相重朱戶人稀到半掩香苞蝶未知想像  
江南今盛發亦經頻雨稍離披

次韻瀛倅鄧慎思見寄

官是麟臺却佐州蓬瀛俱稱列仙遊憶分曉色趨天闕想  
對春風倚郡樓書付塞鴻應易到人如隴水正分流江湖  
未有歸耕處何日相逢說旅愁

試院書事呈子駿明叙

憶初懷詔下天街紅燭相隨御史來場屋喜遵新定格朝  
廷思見已成朽誅鋤險異歸平坦洗濯英華出草萊文藻  
諸生皆足用更期儒行比騫回



館中夏日

珍簟舒明玉涼牕納碧天殿樓傳遠鼓宮井取淡泉竹籜  
風頻脫榴房晚更鮮却驚非故國五月未聞蟬

直舍新闢西牕二首

推倒西墻平日功暑天饒作一牕風人間豈有炎涼隔只  
在施爲向背中

幾歲榴花蔽曲隈繁陰初逼坐中來西鄰小檻如圖畫偷  
入簾帷次第開

送芸老通判

御史連章乞此行制書優遣副專城京都豈乏翱翔處忠  
義先期去就明祖帳盃盤畱晚色關山草木動秋聲西州  
莫作經年計早晚君王召賈生

蛤蜊

去年曾賦蛤蜊篇旅館霜高月正圓舊舍朋從今好在新  
時節物故依然棲身未厭泥沙穩爽口還充鼎俎鮮適意  
四方無不可若思鱸膾未應賢

次韻李端叔見贈

君才瀟灑應時流久滯寧非命壓頭昨見河南推賈誼行  
聞天子召吾丘已無痛飲觀風味猶有新詩講報投京洛  
塵沙著人甚清涼高爽憶宣州

寄會稽丞趙振道

龜峰琬琰翠成堆軒檻前當秀色開此地登臨比圖畫與  
君談笑繼樽罍傳聞佳景無時乏依舊清江不斷來今日  
關河隔千里相逢何處少徘徊



正何清海集金  
二一五  
聞表忠正卒于宿州  
畫舸西河載酒回東籬持菊待君來何知頃刻成千古不  
及從容共一杯羈旅夢魂難際接平生交分但悲哀中年  
萬事長心惡何處愁眉得暫開

苦寒

晨風獵獵卷書堂坐愛松筠耐雪霜歲律崢嶸催暮景時  
光宛轉逼新陽金卮滿引顏雖解石火淡籠焰不長安得  
仙家却寒術吸喬霞氣赤城傍

介之會徐氏家飲薄暮不歸爲詩招之

金鞍駿馬照朱門樂會高張晉楚軍狂客浩歌翻白雪艷  
姬醉舞轉紅裙花光灼爍筵前錦酒韻氤氳盞上雲爭似  
竹牕風月夜青燈殘茗細論文

題介之小閣

畫簾初卷碧山低面面青藍翠拂衣秋水暮天長一色渚  
鷗沙鴈或雙飛煙霞逗眼光相亂松竹敲風韻更微却笑  
屈原顛顛甚漁歌何苦淚交揮

江上

萬里長江一葉舟客心蕭索已驚秋亂霞影照山根寺落  
日光翻水面樓淺浦耀金知躍鯉前灘點雪見棲鷗少年  
壯氣悲寥廓未忍滄江下釣鉤

夜歸口占示同行者

一天星月明如畫萬樹杉篁吟戛秋隱約棹歌聞別浦青  
燐漁火見孤舟身居簡冊三冬學心入滄溟萬里遊鬢  
重陽正明日與君攜酒豫登樓



文仲清江集鈔

秋月

孤枕夜何永破窻秋已寒雨聲衝夢斷霜氣襲衣單利劍  
摧鋒鏑蒼鷗縮羽翰平生衝斗氣變作淚汎瀾

次錢穆父新涼可喜

霜飈結新寒草木起餘怨翩翩前庭葉追逐已千萬斜陽  
背西壁迤邐落藤蔓安得金滿堂聊換酒家券追隨雙鷓  
鴒鵠擺脫舊籠囹胡為汗流赭日與蠅爭飮常恐計不就更  
以詩屢勸江湖秋水高百尺風帆健何當開竹溪玉腕互  
酌獻左手持蟹螯平昔固有願

四月三十日慈孝寺山亭席上口占送子敦都運待

制赴河北

送客城南寺蕭然雲泉秋客意在萬里聊作須臾游昨夜  
過新雨清風滿梁州簪裳合俊彥河圖並天球古來功名  
人未就不肯休譬如鑿空使尚致安石榴矧今南畝氓往  
往東西流君能安輯之千倉與萬軸

將至南都途中感舊二首寄錢穆父

北風吹雪滿皇州攜手同為落魄遊一作漢路岐騰萬  
里江湖塵土積千憂世情共逐飛蓬轉人事都如激浪流  
只待清談慰愁病月明幾夜促歸舟

冉冉星霜七換年故人已上碧雲天書憑去鴈雖無便路  
出名都亦有緣秋晚樓臺風作雪雨餘碣岸柳生煙應煩  
北道開樽俎又費公庖幾萬錢

次韻穆父見戲



當年同望赭袍光萬事爭先  
 彩鏘一別已經陵谷變再  
 來不覺路岐長黃金久壓腰間重  
 白筆纔容柱下藏惟願  
 山林息枹鼓免教鳴隼嚇鴛凰

余家近被穿窬累夕隣居  
 擒盜者叫呼達旦未嘗獲

安寢也持此以乞隣于京尹



